

Inuusuttunut inissianik Namminersorlutik Oqartussat aningaasaleeqataaffigisaannik sanaartornissaq pillugu apeqquteqaat aallaavigalugu oqallinnissamik siunnersuut
(Inatsisartuni ilaasortaq Jane Petersen, Inuit Ataqatigiit)

Akissuteqaat

(Ineqarnermut, Attaveqarnermut Angallanermullu Naalakkersuisoq)

Aallarniutigalugu Inatsisartuni ilaasortaq Jane Petersen apeqquteqaat aallaavigalugu oqallinnissamik siunnersuutaanut, inuusuttunut inissiat pillugit Naalakkersuisut isumaannik nassuiaateqarnissamut periarfissiisumut qutsavigissavara.

Inuusuttunut inissianik, aammalumi ilinniartunut inissianik pisariaqartitsineq Naalakkersuisut eqqumaffigisorujussuuaat. Ineqarnermut akisussaasutut inuusuttunut inissianik, taamatullu ilinniartunut inissianik, imaluunniit inissianik akuleriisitsiviusinnaasunik, inuusuttunit taamatullu utoqqarnit, inissianik minnerusunik atorfissaqartitsisunit najorneqarsinnaasunik sanaartornissamut kommunit ilaasa nunaminertanik naammattunik atugassiisannginnerat annertuumik isornartoqartippara.

Naalakkersuisunut siulittaasup ukiortaami oqalugiarnermi oqarneratut kommunit innuttamik inissianik pilersorneqarnissaat suliassaraat. Tamanna soorunami aamma innuttaasunut inuusuttunut attuuppoq. Kinguaariinni arlallit illup ataatsip iluani, aammalu amerlanertigut inissakilliorfiusartuni najugaqartarnerat inooqatigiinnikkut aningaasaqarnikkullu annertuumik unammilligassartaqarsinnaavoq. Tamatuma saniatigut inissiat sananeqarnerminni inunnik siunertarineqartumit amerlanerusunik najorneqartillugit peqqissutsikkut ulorianartorsiorneq annertuuseriangaatsiartarpoq.

Pingaartumik illoqarfinni ilinniarfiusuni inuusuttut akornanni annertuumik inissaaleqisoqarmat Naalakkersuisut eqqumaffigilluinnarpaat. Tamanna pissutigerpiarlugu ajornartorsiut tamanna aaqqinniarlugu immikkut ittumik suliniuteqaqqullugit atorfilittat peqquneqarput. Tamatumunnga atatillugu illuutiteqatigiiffiup Illuut A/S-ip inissianik sanaartortinneqarnissaa, tamatumalu kingorna angujuminartunik attartornermut akiliuteqartitsilluni inissianik attartortitsisinnaanissaq anguneqarsinnaavoq.

Ajornartorsiutilli aaqqinneqarsinnaanerata anguneqarnissaa sioqqullugu kommunit inissialiorfiusinnaasunik naleqqunnerusumik illoqarfimmi pilersaarusiamik suliaqarnissaat pisariaqarpoq. Attartortunngortussat angallanermut aningaasartuutaat killilersimaarniarlugit, inuusuttunut inissiat ilinniarfinnut aammalu illoqarfiit qeqqannut qanittumi sananeqassappata naleqqunnerpaassaaq.

Pingaartumik Nuummi sanaartugassanut annertunerusunut nunaminertat naleqquttut nassaariniarnissaat maannamut unammillernartuusimavoq, tamannalu pissutigerpiarlugu Nuup illoqarfiani nunaminertanut pisariaqartinneqartunut siunissaq eqqarsaatigalugu aaqqiissutissanik kinguneqarluarsinnaasunik nassaarniarloqarnissaa pillugu Naalakkersuisut Kommuneqarfik Sermersooq peqatigalugu eqqartuisimapput.

Tamanna pissutigalugu kommunit siunissami ungasissumi nunaminertanik atuinissamut pilersaarummik, utoqqaat, inuussuttut allallu inissianik immikkut pisariaqartitsisut, soorlu anaanat inuussuttut isumagineqarnissaannik siunnerfeqarfiusumik saqqummiussisinaanissaat Naalackersuisut naatsorsuutigaat. Aammattaaq ilinniartunut atugassarititaasut pitsanngorsarniarlugit ulluunerani paaqqinnittarfeqarneq sammineqartariaqassaaq.

Aallarniutitut oqaaseqaatit taakku tunngavigalugit pilersitsiviulluartumik, piviusorsioortumik pitsaasumillu, inassuteqaatinik aalajangersimasunik kommuninut nassarsinnaasannik inerpeqarsinnaasumik oqallinnissaq qilanaaraara.